

08 JUL 2001

Mahathir-Projek (Dengan gambar)

DR MAHATHIR TINJAU KEMAJUAN PROJEK DI LANGKAWI

LANGKAWI, 8 Julai (Bernama) -- Perdana Menteri Datuk Seri Dr Mahathir Mohamad hari ini melawat ke beberapa tempat untuk meninjau kemajuan yang dibuat ke atas projek-projek pembangunan di pulau peranginan ini.

Dr Mahathir, yang tiba di sini malam tadi untuk lawatan sehari, diiringi Menteri Besar Datuk Seri Syed Razak Syed Zain, anggota Parlimen Langkawi Datuk Abu Bakar Taib dan para pemimpin tempatan lain.

Tempat pertama yang dikunjungi beliau ialah Oriental Village, sebuah pusat membeli belah bersepadu, yang mencakupi projek kereta kabel yang menghubungkan Gunung Machinchang setinggi 708 meter.

Projek berharga RM46 juta itu, yang dijalankan secara usahasama oleh Dopple-Mayer dari Austria dan sebuah syarikat tempatan, dijangka siap pada Mac tahun depan.

Dr Mahathir diberikan taklimat mengenai kemajuan projek itu oleh pengarah urusan Wyss Planning Consultants Sdn Bhd, Dr Peter A. Wyss.

Dr Mahathir kemudian melawat Pantai Kok di Teluk Burau di mana satu projek pemulihan dan penahan ombak sedang dilaksanakan.

Projek yang menelan belanja RM29.6 juta itu, yang sudah 73 peratus siap, dilaksanakan oleh Lembaga Pembangunan Langkawi untuk menjadikan Teluk Burau sebagai sebuah pusat pertumbuhan baru yang lengkap dengan sebuah taman rekreasi dan bazar membeli-belah untuk menarik lebih ramai pelancong.

Dr Mahathir juga melawat litar lumba Kart Antarabangsa Morac di Pantai Cenang yang akan menganjurkan beberapa perlumbaan go-kart termasuk Kejohanan Perlumbaan Indy 40 Enduro Go-Kart pada Ogos ini.

Beliau juga meninjau kerja yang dijalankan untuk memperluaskan litar lumba itu dari 990 meter kepada 1,230 meter yang menelan belanja RM3 juta.

Sebuah tempat duduk berbumbung yang boleh menampung 600 orang akan juga dibina di bawah projek pembesaran itu yang dijangka siap menjelang kejohanan Go-Kart Rotax Akhir Dunia pada Disember.

Dr Mahathir juga melawat ke kawasan hutan paya bakau di Kilim, timur laut dari Langkawi sebelum melawat ke Gua Kelawar, sebuah pusat tarikan utama di sini.

Beliau juga dijadual melawat Galeria Perdana, yang menempatkan koleksi cenderahati yang diterima oleh Perdana Menteri, sebelum berlepas pulang ke Kuala Lumpur pada pukul 6 petang.

-- BERNAMA

NH AKD